

Oqaluuserisassanut nassuiaat.

(Inatsisartut Siulittaasuut)

Inatsisinut Ataatsimiititaliaq qinnuteqarpoq oqaluuserisassani immikkoortut 47 aamma 140 aappassaaneerneqarnissaasa kinguartinneqarnissaannik.

Immikkoortoq 47-p qulequtaraa: Pisortat ataatsimoortumik allaffissornerisa aaqqissugaanerannut atatillugu naliliinissamut isumalioqatigiissitamik pilersitsisoqarnissaanut Naalakkersuisut peqquneqarnissaanut Inatsisartut aalajangiiffigisassaattut siunnersuut. Maanna suliassaasut aallaavigalugit allaffissornerup annertussusaa isumalioqatigiissitap nalilersussavaa, suleriaatsit sunniuteqarluarnerusut pilersinnissaanut immikkoortorta qarfiillu suliassa qarfiillu (sektorit) akimorlugit suleqatigiinnerup pitsanngorsaaviginissaanut periarfissat misissussallugit, kiisalu allatut aaqqissuussinissamut periarfissanik siunnersuuteqarluni. Siunnersuutini tamani inatsisit ingerlatsinermut tunngasut qasukkar-tinneqannginnissaat aallaaviussaaq. Isumalioqatigiissitap inunnit sektorinit assigiinngitsuneersunit inuttaqassaaq, tassa pisortat sektoriineersut aamma namminersortut sektoriineersut ilaasortat misilittagaqartut amerlaqatigiissallutik. Isumalioqatigiissitap assigiinngissitaartuneersunit ilaliussanik sulisitaqassaaq, sulininilu ukiut marluk iluanni naammassissallugu. Tamatuma kingorna isumalioqatigiissitap kaammattuutai Inatsisartuni naalakkersuinikkut suliarineqassapput.

Immikkoortoq 140-p qulequtaraa: Kalaallit Nunaanni pinerluttulerineq pillugu inatsisip aamma Kalaallit Nunaanni eqqartuussisarneq pillugu inatsisip allanngortinneqarnissaanut missingiummut Namminersorlutik Oqartussat tapersersuinissaat pillugu Inatsisartut aalajangiiffigisassaattut siunnersuut (Oqarasuaatikku nalunaaruteqartarneq, kalaallit nunaanni pinerluuteqarsimasunut inissiisarfinni pissaanermik atuineq, kiisalu palleeqqusinnginneq, sumiiffimmeeqqusinninneq peersitaanerlu il. il.) aamma palleeqqusinnginneq, sumiiffimmeeqqusinninneq peersitaanerlu pillugit inatsisip Kalaallit Nunaannut atuutilernissaa pillugu peqqussut aamma pinerlunnernik eqqugaasimasunut naalagaaffimmit taartisiaqarnissaq pillugu inatsisip allanngortinneqarnera.

Immikkoortut 47 aamma 140 ulloq 9. november aappassaaneerneqarnissaat siunnersuutigineqarpoq.

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq qinnuteqarpoq oqaluuserisassani immikkoortut 120-p 55-illu kinguartinneqarnissaannik.

Immikkoortoq 120-p qulequtaraa: Uunga siunnersuut: Tusagassiorfinnut tapiissuteqartarneq pillugu Inatsisartut inatsisaat nr. xx. xx 2016-imeersoq.

Immikkoortup ulloq 9. november aappassaaneerneqarluni ulloq 16. november pingajussaaneerneqarnissaa siunnersuutigineqarpoq.

Immikkoortoq 55-ip qulequtaraa: Meeqqanut suli atualinngitsunut perorsaanikkut ineriikkiartuutaasunik ulluunerani neqeroorutinut pissarsinissamut utaqqisarnerup qaammatinik immikkut aalajangersarneqartunik qaangerneqaqqusaajunnaarnissaa anguniarlugu, Meeqqanut suli atualinngitsunut perorsaanikkut ineriikkiartuutaasunik ulluunerani neqeroorutit pillugit Inatsisartut inatsisaanni nr. 16, 3. december 2012-imeersumi § 5-ip allanngortinneqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

Immikkoortoq 55-ip ulloq 16. november aappassaaneerneqarnissaa siunnersuutigineqarpoq.

Siunnersuuteqartup immikkoortoq 105 tunuartippaa, tassalu:

Namminersorneq pillugu inatsit tunngavigalugu isumaqatigiissutaasut oqar-tussaaffiit akisussaaffiillu nunatsinnut nuunneqartussat pillugit ersaris-saasoqassasoq. Taamaalilluni oqartussaaffiit nunatsinnut nuunneqarpata ilisimaneqarsinnaaqqullugu oqartussaaffiit aalajangersimasut qanorpiaq si-naakkutissaqqartut, aamma aaningaasaqarnikkut qanoq nunatsinnut pisis-saaffiliinersut. Suliassaqarfiit pineqartut qanoq sunniuteqassanersut qulaa-jaqqullugit Naalakkersuisut danskit naalakkersuisui peqatigalugit ersaris-saatititik nassuiaasioqqullugit peqquneqarnissaannik Inatsisartut aalajan-giiffigisassaattut siunnersuut.

Immikkoortoq ullumi oqaluuserineqartussaagalarpoq.

Ilaasortat uku akornganni taasisarnerit pillugit isumaqatigiissuteqartoqarpoq:

Kalistat Lund, Inuit Ataqatigiit aamma Laura Táunâjik, Siumut

Michael Rosing, Demokratit aamma Aqqaluaq B. Egede, Inuit Ataqatigiit

Ane Hansen, Inuit Ataqatigiit aamma Jens-Erik Kirkegaard, Siumut